



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 3

Taoba Thailand PM Thaksin anema ken o benok

Terenlok tenung nung tribal tem indang ali rakzükher: Gandhi

VOL. XXI ISSUE NO. 115 (ADOK 115) DIMAPUR RASEMNÜ (WEDNESDAY) TSÜKLAI (FEBRUARY) 07, 2024 ₹ 5.00

Wokha District nung NH-2 mokdang

Dimapur, February 6, 2024 (TYO): February 8, 2024 anepdang 6:00 ako nungi mapang telatet makai National Highway-2 mokdangtsü osang metetdaksüogo.

February 1, 2024 nü Wokha Deputy Commissioner dang anogo pungu tsüngda NH-2 (Old NH-61) nung KM 72.40 nung KM 83.00, Wokha district tsüngda two-lane lenmang yangluba mapa tenzüksü atema anogo züngzüksü saka iba amaji meinyakba ajanga Wokha district nung telok balala lokteper tentetba Joint Action Committee (JAC)-i National Highway mokdangtsü metetdaksü.

Onoki takhangba agütsüba aser bangdakpurtem den aiben

lemsatepba onüktem asoshi mapa meinyak tashi aser iba lenmang nung mapa tenzüka mao tashi mokdangtsü ta JAC-i ashi.

Iba mapang tanga district tem nungi aruba garitem Wokha district telungi maitdaksütsü anungji Wokha ajanga senzürtemi iba ya meteta alitsü mepishir. An Ano, Government Registered garitem dak alaka intra-district vehicular movement melar, ta JAC-isa metetdaksü.

Iba mokdang kübok police, paramilitary forces, ambulance dena medical services & shiranger mesüra tasü mang abenba nija garitem, fire & emergency services, postal services aser press madener ta parnokisa ashi.

School Education Department-i tesayurtem shimoktsü & kasa alemtsü

Kohima, February 6, 2024 (TYO): Sorkar school tem nung tesayur peria maliba atema department-i nungdakba nung ajemdaker tesayurtem shimoktsü aser tesayurtem kasa lemsatsü atema rationalization exercise agütsü ta School Education & SCERT Advisor Dr. Kekhrielhoulie Yhome-i ashi.

"Onoki NPSC aser NSSB ajanga recruitment inyaksü. Onoki parnok den iba atema olemtepdar" ta Naga Students' Federation (NSF) aser Eastern Naga Students Federation (ENSF) aser parnok kübok federating units den senden ka amandang ashi.

Department indang mapaji tesayur agütsütsü, nungdakba ajitetsü aser infrastructure o school management tajungba kümdaktsütsüba lir. Yaküm November ita tesayurtem lemsashiba mapa tenzüksüba liasü saka mapang agir kechiyong anogoshia data merükteter, ta pai ashi.

"Asenoki education system tajungba kümdaktsütsü atema primary level tashi alutsüba aser tanurtemi shisaliok tim angazüksü. Asenoki village level nung data tajung nungdaker aser iba ajanga policy tejangja latetsü" ta Advisor Yhome-i ashi.

Department-i nungdakba data ajak bendenogo aser policy ka yanglutsü renemogo. Onoki policy yanglubaji asen nübör ajak ajangzüksü asoshi asütsü. Iba mapa nung kaketshir teloktem amalitep alitsüba, ta paisa shisem.

"Onoki kin shia atema textbook kaka renemer aser iba atema department-i kin balala literature boards den ajurutedar"

ta paisa shisem. **Tesayur 31, 063 lir:** Nagaland nung tesayur 31,063 lir. Iba nung sorkar school tesayur 18,725 aser nija school tesayur 12,338 lir, ta Dr. Yhome-i ashi.

December 2023 data nung ajemdaker sorkar school tem nung kaketshir 1,50,483 aser nija school kaketshir 2,59,480 lir. Nagaland-i küm shia private sector nung school education atema Rs. 800 nungi Rs. 900 crores shi endoker, ta paisa metetdaksü.

"Nagaland nung department tulutiba rongnung tanabubaji school education lir aser yaküm budget nung itasen kija asoshi Rs 1713 crores endok. Onoki ozü department ya sentsüh atsühba department ka mesüdaktsünür. Onoki shisa kaa senotsü endokba repringshimnür" ta Advisor Dr. Yhome-isa ashi.

YAA mapang züngzüksüba indang: Pai Yashi Yimkhiung Akheru Arihako (YAA) den ajurutepa parnoki agütsüba ultimatum indang lemsatep.

YAA-i anogo 14 nü inyaksü mapang züngzüksü saka parnok nungdakba ajak meinyaksüteter. Onoki merangdar saka mapang agütsü, ta Dr. Yhome-isa ashi.

Sensaksemba mapang NSF, ENSF aser parnok federating units nungi tanishirtemi Nagaland sorkar school tem nung khuret, tebilemtsü aser tayongzükba balala lemsatepba liasü.

School Education & SCERT Commissioner and Secretary Kevileno Angami aser School Education Principal Director Thavaselean K natia department-i metokmeperi balala atema inyaka aruba osang lemsatep.

Tetsürtem tebur den kasa kümogo: NCW chairperson Rekha Sharma



Kohima, February 6, 2024 (TYO): Tanü putu nung tetsürtem ya tebur den kasa mesüra tashi taitba lir kechiyong tetsürtemi tebur inyaktetba ajak inyaker ta National Commission for Women Chairperson Rekha Sharma-i ashi.

Züngsem 27-i akümba Women on Wheels (WoW) telok kati North East India sema senzür aser tanü Naga lisopur tetsürtemi parnok den sensaksem mapang ka agia liasü.

"Teburtemi inyaktetba ajak tetsürtemi inyakteter saka teburtemi sorochiokba aser tanur asoba dena tetsürtemi inyaktetba meinyaktetsü. Loktilibai langka ka nung tebur aser tetsürtem bendanga liasü saka meilongi tetsürtemi tebur ajateter saka teburtemibo tetsürtem majateter" ta Rekha Sharma-i ashi.

Tetsür drivers aser co-riders-i tesem ka nungi ka sema senzüba atema tenüngsang agütsür aser parnoki maneni Northeast osang prokshitsü imlar, ta lai ashi.

"Northeast ama nisung aikati mesemdangba tesem ajanga

süidang, nenoki tetsürtem dang masü saka teburtem ajungmesor. Teburtemia arutsüba aser iba ama sentong nung shilem agütsüba" ta Rekha-isa ashi.

"Tetsür kati tesem ka nungi kati la sasa gari ania senzübaji tashitait tetsür ka lir. Nenoki kechi mapa inyaker ibajia tajung saka asenok sasa lemsatepba ya ajak dang tongtipangtiba" ta laisa shisem.

"Northeast nung tetsürtemi shishilembaba aser taküm mesütsü maparen inyakba atema tenüngsang agütsür. Northeast nung maparen melenshir aser tesüba dang nungi tajungba akümer" ta Rekha-i küm tenet tejakdang Nagaland-i aruba bilemteta ashi.

"Tanü sorkari inyakba aser temelenshi asenoki angur. Ek Bharat Shrestha Bharat kübok temelenshi aruogo. Linük kübok tanga tesemtem nung Northeast tetsürtem dak tenük yok saka tangbo iba inyaksangshi mali akümba dang masü NorthEast ya linük nung shilem ka ta asüba tangatetba aruogo" ta laisa metetdaksü.

National Women Commission chairperson-isa state commission ajak külemi longjemer inyaksü ayongzük.

Iba sentong nung Social Welfare Advisor Wangpang Konyak-ia WOW züngsemtem nem tenüngsang agütsü.

Nagaland nung tetsürtemia tongti shilem agidar aser Assembly nung menden 2 takok ngua putiotsü yanglutetogo aser 33% women reservation dena Municipal Bill agizükogo, ta Wangpang-isa ashi.

'Women on Wheels' ya NAMASTE Foundation ajanga ayongzük aser gari ajak tetsürtemi anir. Iba sentong ya 'Dekho Apna Desh' ajungketsü atema lir aser iba ya tawa Prime Minister Narendra Modi-i tenzüksüba Ek Bharat Shrestha Bharat Scheme indang sentong lir ta Nagaland State Women Commission chairperson Nginyeih Konyak-i ashi.

National Commission for Women Chairperson Rekha Sharma-i asüngnep WoW rally tenzüksütsü aser Dimapur atongba sülen Assam-i aotsü.

Northeast nung India-Myanmar arrtsü ajunga atsü dangtsü

Guwahati, February 6, 2024 (Agencies): Narendra Modi-i aniba BJP sorkari arrtsü akangshitsü tenangzükba lir ta Union home minister Amit Shah-i Mongulbarnü ashi.

Centre sorkari Northeast nung kilometre 1643 talang India-Myanmar arrtsü ajunga atsü dangtsü lemtetogo ta Amit

Shah-i ashi.

"Artsü tajunga anüksü atema arrtsülen patrol track ka yanglutsü" ta paisa ashi.

Tengnoupal district, Manipur kübok Moreh nung arrtsü kilometre 10 atsü dangogo ta Amit Shah-isa shisem.

"Maneni, Hybrid Surveillance System (HSS) ajanga atsü

atsü dangba pilot projects ana tang teinyakdak lir. Sorkari Arunachal Pradesh aser Manipur nung kilometre kaka atsü dangtsü" ta paisa ashi.

"Manipur nung arrtsü kilometre 20 shi atsü dangtsü mulunga agizükogo aser kobi melii iba mapa tenzüksü" ta Union Home Minister-isa ashi.

AKM-i Mkg. nung dokan rongtoker atema tenla saruteptsür

Mokokchung, February/ Tsüklai 06 (TYO): Mokokchung Municipal Council, Shopping Complex nung February 03 aonung ajungbena mi adoka menakrepa rongtoker 62 aser terara raksar 73 liasü aser iba ya ajanga sen crore aika akoksaba dang masü saka iba lendong ya ajanga kanga dang meranga inyakbapur kija aser kibong aika takum aser kibong nung takoksa tia tulu ajuruogo.

Mokokchung Municipal Council Shopping Complex nung shishilembartem kibongtem rongtak teyari nungtaka aliba mapang ka nung Mokokchung Deputy

Commissioner ajanga parnok timtema alibapurtem nem teyari agütsütsü asoshi nübör nungi teyari ama temelunger tenla sarutsü asoshi Ao Kaketshir Mungdang ajanga achayangtsü nunglokja lir, anungji nübörtemi mulungsoa tenlaba ajanga parnok shishilembartem yaritets asoshi nübörtem ajaki tangatetba tajung nung tenla agütsütsü AKM ajanga sangdongka nung metetdaksüogo.

Ao Kaketshir Mungdang ajangasa tangatetba tajung nung teyari tenla agütsüba ajanga nungtakbapur aser timtema alibapur aika yaritetsüta asüba tamang nung agüja aliba account

nung sen inoktsütsü aser asü dangyatsü nübör dang metetdaksüogo.

Account Name: Ao Students Conference
Account Number: 1235104000052915
IFSC Code: IBKL0001235
GPay-9774614389
Onenpong, Vice-President (AKM)
Nungtak asü dangyatsü contact number.
7085652415-Bendangnangba, Info. & Publicity Secy.(AKM)
8837043398-Bangjungkaba Imchen, Asst. General Secy.(AKM)

AROs atema certification programme tenzükogo



AROs atema Certification Programme anogo pongu asoshi Administrative Training Institute (ATI), Kohima nung training agiba noksa nung angur.

Dimapur, Tsüklai/February 06 (TYO): Lok Sabha atema aruya aliba general election asoshi Nagaland nung Assistant Returning Officers (AROs) atema Certification Programme anogo pongu asoshi Administrative Training Institute (ATI), Kohima nung February 5 nü tenzükogo.

Iba training ya Election Commission of India (ECI) ajanga yokba Resource Persons/

National Level Master Trainers (NLMTs) temi agir.

Iba training nung instructions on criminal antecedent, Scrutiny of Nomination, withdrawal of candidature and allotment of symbol, Model Code of Conduct, Qualification and Disqualification, E-Roll, District Election Management Plan, SVEEP, Service Voter Portal, EMS, ETPBS, NGRS, Observer Portal, IT Application including

Nomination, Permission, Poll Day, Counting, etc, ERO-Net, Postal Ballot, Polling Party and Poll Day arrangement including polling stations, Vulnerability Mapping, Expenditure Monitoring, Paid News and MCMC, EVM-VVPAT Administrative Procedure, EVM-VVPAT Hands-On, ETPBS, Counting and Declaration of Result amala session balala lemsar training agütsür.

RD Block Kubolong nung Credit Camp ayongzüka agi

Dimapur, Tsüklai/February 06 (TYO): India indang ato kilonseri Lakapati Didi sentong semzüksüba den külemi Mokokchung district kübok RD Block Kubolong nung February 4, 2024 nü District Level Credit Camp ayongzüka liasü.

Iba camp ya Nagaland State Rural Livelihoods Mission (NSRLM) kübok District Mission Management Unit (DMMU) Mokokchung ajanga ayongzüka liasü. Iba credit camp ayongzüka nukjidadong ya tetsür Self Help Group (SHG) züngsemtem bank nungi loan agia jurila maparen balala inyaka pei takum jenjang tajungba kumdaktsüsü asoshi liasü.

Kheza Kin, Branch Manager,

Central Bank of India, Kubolong ajanga loan agiba yimyatem, aser loan balala indang rateta ashi aser SHGs tem dang loan agiba tim lenmang nung amshitsü ajungshia liasü.

Kubolong block kübok SHGs 13 nem Branch Manager, Central Bank of India, Kubolong, Kheza Kin-i loan sanction tem amokja liasü.

Takok ngua inyakba aser grassroot level nungia shilem tajung agiba mission ji NSRLM ya dang lir, ta iba sentong nung Pursenla, Field Officer, Nagaland State Cooperative Bank, Mokokchung ajanga ashi.

Lai SHGs tem dang lungjemer ka ama inyaka pei aliba tesem nung temelenshi

bener arutsü ayongzüka liasü.

Lai SHGs tem dang maneni loan agitsü aser mapang shidak nung menoktsü ashi.

Mongchen Aier, District Coordinator (Financial Inclusion) ajanga Mokokchung district nung SHGs tem jenjang asadanga jembidang, bank balala nungi SHGs 760-i loan agiogo, ta ashi.

Tang tashinung Mokokchung district kübok SHGs 1283 lir aser züngsem 9000 dak tema lir ta pai ashi.

Iba sentong nung menden Limasunep, Area Coordinator (Financial Inclusion) liasü aser Subotula, Block Program Manager, R.D Block Kubolong ajanga metetpela mapang agia liasü.

Heads of Institutions tem dang pei school Geo tag asütsü metetdaktsür

Dimapur, Tsüklai/February 06 (TYO): Nagaland Board of School Education (NBSE) ajanga Heads of Institutions ajunga dang sangdong ka nung school indang geolocation update asütsü atema NBSE portal nung aliba school indang

dashboard nung provision agüja lir, ta ashi.

Anungji Heads of Institutions tem dang Google map nung meinok lira pei school location Geo tag asütsü metetdaktsüogo.

Iba sülen NBSE portal nung school indang page nung log in

asütsü aser school dashboard nung school indang location update asütsü, ta ashi.

Heads of Institutions ajunga (Govt. & Private) dang iba sangdong nung shia aliba ama February 29, 2024 tashinung inyaktsü metetdaktsüogo.



MMC Shopping Complex nung kitsük-kirong lendong ajura alir nem teyari ama Dilong Ward Yimten aser Dilong Youth Association (DYA) ajanga February 6, 2024 nü Deputy Commissioner, Mokokchung nem sen 30,000 amoktsü.

Chümoukedima DC-i ali kiburtem dang metetdaktsür

Dimapur, Tsüklai/February 06 (TYO): Dimapur-Kohima tsiingta NH 29 4 Lane ulushia yanglutsü atema Nagaland Land Requisition and Acquisition Act 1965 indang Section 9 (2) kübok ali aser danga properties/plantations agiba asoshi compensation agütsür aliba ali nung ki o jen, plantations, fisheries aser danga nokdaka aliba structure ajak 4 Lane mapa tajungtiba nung

inyaktsü mechi anogo 15 tsiingta a gi entsü / a z ü n g t e t t s ü metetdaktsür, ta Deputy Commissioner, Chümoukedima, Abhinav Shivam, IAS ajanga sangdong ka nung ashi.

Iba sangdong sülen ajaki shidak anidaktsüla aser 4 Lane NH 29 Dimapur-Kohima project tajungtiba nung inyaktettsü asoshi iba mapa inyaker den ajaki yariteptsüla, ta sangdong ajangasa ashi.

Longleng DPDB senden February 19 nü amentsü

Dimapur, Tsüklai/February 06 (TYO): Longleng District Planning & Development Board pur February 2024 atema senden ya February 19, 2024 anepdang 11:00 ako nungi amentsü. Iba senden nung

Department of Forest ajanga department inyakyim osang agütsütsü.

Anungji iba senden nung züngsem ajak medema arua adentsü metetdaktsür, ta sangdong ka ajanga ashi.



Kentener Oren Mozhui-i Nagamese oshi nung ken ana, Miss Nagaland aser Mesa Meshi Love, sayaogo. Iba ken ya John Pfokrelo teyari nung Clef Ensemble Studio, Mao Gate (Manipur) nung record süa yanglu aser VIP State Guest House, Kohima nung saya. Iba ken ya YouTube nunga angutsü. Ken ana ya Viruokuo Zumu, District Youth Resources Officer, Kohima aser Visazolie Peter, A.L.O nati sayatsü.

Botsa PHC nung Oral Health training agütsü



Dimapur, Tsüklai/February 06 (TYO): National Oral Health Program ajanga National Tobacco Control Program Kohima den lungjemer Health Workers, Ashas aser Anganwadi nung inyakerem asoshi training ka Primary Health Centre, Botsa nung February 2, 2024 nü agüja liasü.

of Oral Health and Hygiene' onük nung jembia liasü.

Paisa yimya shidak amshia tebu meyutsü tejangja sayua liasü.

Iba training ya NOHP aser NTCP, Naga Hospital Authority Kohima, Department of Health & Family Welfare, Kohima ajanga ayongzüka liasü.

Social Worker, Achila Walling-i moko achiba ajanga temang nung timtem agütsüba indang rateta ashi aser Pelebeinuo Khezhe, Psychologist, National Tobacco Control Program Kohima ajanga moko achiba yimya indoktsü indang sayua liasü.

Iba training nung District Oral Health Officer, Kohima, Dr. I. Simon Sum-i Importance

Iba sentong nung shilem ka ama toothpastes aser toothbrushes den IEC osettem lema agüja liasü.

ED-i Kejriwal indang personal secretary, AAP senyur meita ao



Delhi Minister Atishi-i ED-i lenirtem ki meita aoba dak sendakba nung osangbenertem den sensaksemba mapang taogokba noksa nung angur. Atishi-i Mongolbarnü ashiba agi, ED nem lenirtem ki meita odakja Center nung BJP-i aniba sorkari par part tsübudakja ajem ajema kümdaktsütsü meranger.

New Delhi, Tsüklai/February 6 (Agencies): Enforcement Directorate (ED)-i Mongolbarnü Delhi Chief Minister Arvind Kejriwal indang personal secretary Bibhav Kumar aser Aam Aadmi Party (AAP) dak sendaka aliba nisung kar ki 10 dak tema meitaogo. Senotsü ochi mashi ken o dak sendakba nung ED-i iba jenjang agiogo.

ED-isa, taoba Delhi Jal Board (DJB) züngsem Shalabh Kumar aser AAP treasurer ND Gupta na meyong kiojen aser tesem kar meitaogo. Gupta ya AAP indang Rajya Sabha züngsem lir.

Senotsü ochi mashi ken o ya Delhi Jal Board indang tendering inyakyim nung meshidak aliba dak sendaka lir.

Central Bureau of Investigation (CBI) aser Delhi sorkar Anti-Corruption Branch (ACB) nati ken o benokba dak ajemdaker ED-i, DJB indang tendering inyakyim meshidak aliba bushisüngdangdar.

CBI-i benokba ken o nung ashiba agi, DJB ketdangsürtemi, electromagnetic flow metres installation, testing aser commissioning dak sendakba nung firm ka nem malangba maongka agütsü.

Ken o benoka aliba nungsa, iba firm yagi technical eligibility criteria metongtetaka aser kuli kaket taila benoka bid süaka parnok nem sen crore 38 alang ozüng alema contract agütsüogo, ta shia lir.

ED-i bushisüngdangba sülen, NKG infrastructure-i kuli kaket

taila benoka iba bid akokba aser chief engineer-i kuli kakettem ya mishidak ta meteta liasüba ngutetogo.

Iba ken o dak sendakba nung ED-i nisung anabo puogo.

Kasa mapang nung Delhi cabinet minister Atishi-i lai iba agency inyakyim jungkai adokdaksütsü ta ashiba sülen anogo ka lir tang ED-i iba jenjang agiogo.

"Ni asüng 10 ako nung ED inyakyim temai adokdaksütsü! iba space #BigEDEXposebyAAP ya reprangang," ta lai Hombarnü X sabang ajanga metetdaksü.

La indang Cabinet colleague, Saurabh Bharadwaj-ia X nung iba indang lemsatapa liasü.

"BJP indang Extortion Department (ED) temai adokdaksütsü," ta Bharadwaj-ia shi.

Atishi-i ashiba agi, "ni yashi ED temai adokdaksütsü ta shiogo. Iba ya nokdangtsü atema aser onok tsübudakja ajema ajema kümdaktsütsü asoshi ED-i tanü AAP lenirtem anema jenjang agi tenzük."

"Onoki tanga tesem meita aoba indang osanga angazükogo. ED-i kechi inyaker? Ano lenirtem aika meita aotsü ta angazükogo. Ni BJP aser Modi dang item inyakyim ajanga onok metsübur ta shiner. Liquor ochi mashi ken o nunga ED-i nisung aika apu saka kecha mongutet," ta lai ashi.

Terenlok tenüng nung tribal tem indang ali rakzüker: Gandhi

New Delhi, Tsüklai/February 6 (Agencies): Gandhi lenisüba nung agiba 'Bharat Jodo Nyay Yatra' Mongolbar anepdang Jharkhand kübok Khunti district nungi tenzükogo. Sentong nung pai ashiba agi, state nung taoba BJP sorkari tribal tem indang ali acre aika alizük, saka item alirtem ya tang tashi kecha nunga mamshi dang lir.

Yatra nung shilem ka ama Gumla district kübok Kamdara Chowk nung road show ka nung shilem agiba mapang Congress MP yagi, "Jharkhand nung ni tetsür tribal aika den sensaksemogo aser parnoki ashiba agi, terenlok tenüng nung parnok ali rakzüka company tulutem mesüra NGO tem nem agütsüogo. Iba ya tribal tem atema ken o tulu ka lir," ta ashi.

Paisa, Centre nung Congress-i aniba UPA sorkari

land acquisition law ka benok aser iba kübok Gram Sabha-i temelaba magütsü tribal tem indang ali agitsü makok ta shia lir," ta pai ashi.

"Iba ozüng kübok ali agiaka parnok nem shishilembadak jenjang dang nungi pezüsü agi timba temenok agüja liasü. Ali alizük alibatam küm pongu tsüngda mamshira shitakba kibur nem meyipa agütsütsü," ta Gandhi-i ashi.

Paisa, Jharkhand nung taoba BJP sorkari ali bank atema tribal tem ket nungi ali acre aika alizük saka iba amala alitem ya tang tashi mamshiba atema BJP aija liasü.

"Tang tribal temi parnok ali meyipa aginer," ta pai ashi.

Reservation dak sendakba nung 50 per cent cap agintsütsü pai tenangzükba agütsüba dak sendakba nung

pai, "linük nung shilem 8 tribal tem, shilem 15 Dalits aser shilem 50 OBC lir ta amanger. Ajitasüra kechiba reservation nung 50 per cent limit dang lir," ta ashi.

Gandhi-i Hombarnü, Lok Sabha election sülen INDIA bloc-i Centre nung sorkar kümtetra linük ajunga nung caste census ka agitsü aser reservation dak sendakba nung 50 per cent cap agintsütsü tenangzükba agüja liasü.

Congress lenir yagi iba yatra sentong Khunti district kübok Shaheed Bhagat Singh Chowk nungi tenzük aser Birsu Munda nem tetushi agütsüba sülen Gumla-i ao.

'Bharat Jodo Nyay Yatra' koba Manipur nung January 14 nü tenzükba liasü iba yatra ya Mumbai nung March 20 nü tembangtsü.

Delhi nung LeT kiralongrar ka apu

New Delhi, Tsüklai/February 6 (Agencies): Delhi Police-i, Jammu and Kashmir kübok Kupwara nung Lashkar-e-Taiba module achaayangba züngsem ka puogo, ta ketdangsürtemi Mongolbarnü metetdaksü.

Aija alisang shiba army nungi anener aliba nisung ka lir, pai Line of Control (LoC) adener tanga züngsemtem ket nungi prangbong injang agizükba nung tongtibang shilem agia liasü, ta parnokisa ashi.

Aija alisang ya Kupwara district nung alir Riyaz Ahmad Rather ta jangjaogo aser pa Deobarnü New Delhi Railway Station nung pua liasü, ta police-i ashi.

Pa ya Khursheed Ahmad Rather aser Ghulam Sarwar Rather na den longjemer LoC adener kiralongrar achaayangertemi yokba prangbong aser injang agizüktsü asoshi tasa asar ka liasü, ta police ketdangsür tejen kati ashi.

Jammu and Kashmir nungi bushisüngdangertemi Deobarnü Riyaz Ahmad Rather ya parnoki maktokba kiralongrar module ka dak sendakba ken o nung bushidar ta osang agütsü. Iba module maktokba mapang nisung pongu apu aser parnok ket nungi AK pongu, AK

Magazine pongu aser AK indang 16 nguteta liasü, ta pai ashi.

Item prangbong injangtem ya Pakistan-occupied-Kashmir (PoK) nung amendaka aliba LeT terrorist handlers Manzoor Ahmad Sheikh aser Qazi Mohammad Khushal nati yokba liasü ta ketdangsüri ashiba den tenaprongla ya arrtsü adener inyaksangshia liasü, ta shisem.

Riyaz ya samara bushidar aser pa New Delhi Railway Station anepdang züngia lia atongtsü ta osang agütsüba sülen team ka tenteta New Delhi Railway Station-i yok. Parnoki Riyaz jangja aputsü merangba mapang pa ajen saka exit gate number-1 nung pua liasü, ta ketdangsür yagi ashi.

Pa aser par medemer Altaf na Jabalpur nungi Mahakaushal Express nung tua amen aser Honibarnü 3 ako shi nung Hazarat Nizamuddin railway station tonga liasü, ta police-i ashi.

Tena auto-rickshaw ka bener New Delhi Railway Station tonga liasü. Riyaz ya tanga tesep kati aotsü liasü, ta parnoki ashi.

Riyaz ket nungi mobile phone ka aser SIM card ka ngutetogo aser pa temzüng ozüng tapet dak ajemdaker puogo.



Ato Kilonser Narendra Modi aser Union Minister for Petroleum and Natural Gas Hardeep Singh Puri aser tanga lenirtem, India Energy Week 2024 mapang tangokba noksa nung angur.

Inter-ministerial panel senden ka Feb 8 nü amentsü

New Delhi, Tsüklai/February 6 (Agencies): Temerem tzüyim nung shishilembaba dak sendakba nung tetsükdaktsü adoker aliba mapang iba ken o sensaksemtü atema February 8 nü high-level inter-ministerial committee senden ka amentsü, ta ketdangsür kati metetdaksü.

Taoba mapanga January 17 nü New Delhi nung iba panel senden ka menogo.

External affairs, defence, shipping, finance (department of financial services), aser commerce ta ministry pongu nungi ketdangsür tejentemi iba senden nung shilem agitsü imlar.

"February 8 nü senden amenba mapang ketdangsürtemi parnoki jenjang agibatam indang aser osütsüt belenertem nem teyari agütsütsü asoshi iba mepetmesü bentettsü atema onük balala benoka sensak asemtü imlar," ta ketdangsür yagisa ashi.

Iba senden ya commerce ministry-i ayongzükba lir.

Taoba senden nung commerce ministry-i, Department of Financial

Services (DFS) dang osütsüt belenertem indang credit flow asadangtsü aser achaayangtsü asoshi asüngdangdango, shirnok Temerem tzüyim nung mepetmesü adoker aliba ajanga takoksa ajangshidar.

Kasa mapang finance ministry-i Hombarnü bank aser insurance company tem dang osütsü belenertem indang ken o tem bentettsütsü aser bendanglen shishilembaba nung teyari agütsütsü shiogo.

Yemen nung amendaker aliba Houthi teloki 2023 küm December ita nungi shishilembadang amshiba rongtem amakba ajanga Babel-Mandeb Strait nung tensa mejungi kümer lir, koba Red Sea aser Mediterranean Sea nungi Indian Ocean-i aitba shishilemba dang amshiba tongtibang lenmang ka lir.

Iba ajanga rong nung khu abenba jenjang tali kümogo aser khutem Europe aser US atongtsü mapang talangba agir, kechiyong rongtem Africa meketa Cape of Good Hope ajangba lenmang amshir.



Gumla district nung 'Bharat Jodo Nyay Yatra' mapang Congress lenir Rahul Gandhi tangokba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, FENRUARY (TSÜKLAI) 07, 2024

Mokokchung mi lendong

Mokokchung town nung nübertem nem teyari tulutiba agütsüba ki, Mokokchung Municipal Council purtem meyong Shopping Complex nung taoba Honibar aonung mi adoka yangji dokan 62 aut kuma rongdokba aser dokan 73 raksaba takoksaji parnok dokan kiburtemji dang masü saka Aor ajak asoshi takoksa aser temulung shirangtsüka lir. Iba kidang ya dokan tapu aika lir aser itemji, tzümar ishika dak alaka, lisopurtemi dang amener. Ano, dokan amenertem rongnungjia tetsür teimba lir. Iba tiaji kodang bilemdangdir, iba ki kisung nung dokan amenertem jagi pei kibong mesüba dang masü saka Mokokchung town nungi bendangleni lisopurtem rongsen moudaktsüi pei lima nung pei nisung ket nungi pei nisung keti odaktsür. Iba amaji ka mesüi MMC Shopping Complex nung amenertemji tzümartem dang asünungbo, asenoki government mapa nung inyakerkem ita sen ajak ya parnok dang nungi nungdak alidang tzümaleni dang bener yokla. Iba ama lisopurtem shishilembaba ki nung mi adoka dokan agi mitsü aser aut kuma rongdoker alidang, Mokokchung district nungi adoker yimten yimsüsürtemi dang masü saka ano lokti tentetemi pei ki rongdok ama aria bilema pei akok agi yariteptsü mulungtetbaji Aotsür Aor telongjem aser temeim sayuba mapa ka asütsü. Lendonga süaka, tia ajung, Shopping Complex floor ka dak alaka ki ajungabo merongdok aser tangar kitem daka mekongshi, Tsüngremi kanga taochi tulu sayuogo aser mi penseper Fire Brigade purtemia kanga meranga mi tongpang nung takok ngua raraogo. Item ajakji asenok asoshi tarutsü atema tansütsü, tebilemdangtsü aser teinyaktsü mapatem asütsü. Atangji, mi lendongji asen yimti nung dang ataloker masü saka tanga yimtiitem nunga atalokba asenoki aiben angur aser angashir. Aji oda, lendong ka atalokli tera tekümdangba aser takoksa ka ajuruli ano tera temerangba aser tekümdangba inyakli ta alima nung nübertem awashi, libaliro aser inyakyim tajungba kuma tejakleni aoer. Itemji, kodaser lendong atalok ? Kodaser takoksa aser tamakok ajuru (?) ta bushisüngdanga kuli tejangja metetba ajanga tarutsü nungbo lendong aser takoksa majurutsüsa sentong tajungba apiteta inyakba ajanga tejaklen jagi otetter. Iba amaji, tang Mokokchung nung mi lendong atalokba kulijia tejangja bushitetsü imlar aser iba kidangji mi lendong atalokdang jet ta mi penseptetsüsa oset shitak yua ali mali asü (?) aser aonung kinükertema shitak yua ali mali asü (?) ta item ajakji bushisüngdanga aoba ajanga tarutsü nung asenoki memeteti mi lendong tulu nungi kümzüktsü. Iba ama lendong nung ya district administration-i dang masü saka state government nungia 'CM Relief Fund' ama nungi takoksa ajurua alirtem nem rongdak teyari agütsütsü nungdaker. Iba denji ano tang ama alima lendong atalokdang yabo 'shir constituency ?' ta mebilemi Aor yimten yimsüsür aser lenirtem ajaki aria bilem sayua takoksa angur yariba aser kiojen yanglushiba maparen nung külemi shilem agitsü junger. Iba kasa tangatetba nung takoksa angurtemji koyimer, koba arogo nungi ta mebilemi, anasa alir kibong kar alima lendong agi tonger alidang arogotemi pei akok tenla bener yimsüsür aser district administration den sarasadem mapang agira, lendong aser takoksa mapang agi temoatsü mapang kuma asen lima nung temelenshi adoktsü. Atangji, tanga lima nung asünungbo tang amaji shishilembaba kidang mi adoka dokan rongdokbaji "insurance company" purtemi menoktsütsüsa insure süa aliba dokantem aser kija süla. Ajisüaka, asen lima nungbo asenok kiojen rongsen 'insure' süa ayuba yimya aser sobaliba mali, kechiyong asenoki temeteta memetet aser metetyonga asenoki asen gari, ki ,dokan aser asenoki amshiba machine-tem Insurance company nung insure süa ayutsübaji amajok aser teindok amai bilemer. Itemji bilemdanga tarutsü asoshi inyaktsü tang ya mapang tajung ka asütsü. Atangji, alima nung lendong aser takoksa ajuruba mapang ya telongjem, temeim aser teyari tendangba mapang lir, asenoka iba tendangba nung ya takok tajung angutsü imlar.

OLEMSABANG

Tsüngrem o pei aginülen asaa meyipzüker benschiba

~ L. Kika Pongener.

Tanü putu nung Khristan tajung karibo Laishiba nung zülua aliba Tsüngrem o agi asaya-menuba, aser pei aginuleni meyipzüker inyaka benschiba kar, iba ocet ajanga tazüngertem den lemsatepnur.

1Timoti-5:17-18. Nashi mo anetdang nai pa tebang tesembangtsü; aser inyakerbo pei taa angutsü tetemsu". Iba laishiba tekong ya Khristan tajung karibo pei aginulen asaa meyipzüker benschir aser bangpettsü kuma jembir. Paul-i pa shiti nung iba o züluba ya, Tsüngrem lartem, Tsüngrem-er wadang nung tenzükertem dang akümtsüba benschitsü aser timtema metoktsüi, tagütsütsü tim taa agütsütsüba indang ashiba sudi ta angateter. Yisu-ia pa nutsung ter-ana temenen tanelatem aritoktsü aser tashitak tapu balala aneptsütsü asoshi parnok yokdang, iba den mesuktepa yamai ashiba angur, "Nenok juli nung hon mesura taribi mesura sen teben. Nenok lenmang asoshi yangkü, mesura sepoksu ana, mesura tsüngsem, mesura mechi teben ; Kechiaser inyakerbo pei chiyungtsü angutsü tetemsu" (Mathi-10:9-10). Tanü putu nung Khristan tajung karibo, iba laishiba tekong ya pei ajung asaa meyipzüker, loktiliba mapa aser arogo mapa nung, rongsen ketangsua amshidang, pei ajangzüktsü aser chidiyungdiba mapa nung mapayui lalushiponga amshiba angur. Tanü arogo nung tenzüker aser loktiliba balala nung tenzüker aikati rongsen ketdangsua amshidang, inyakerbo pei taa angutsüla aser chia-ajemtsüla ta angateter, tim masüba lenmang nung lalushiponga, ochimashi ketdangsua amshir. Tsüngrem o agi salep-sari masütsüla aser asen aginulen asaa aibelena meyipzüker, metetsümonga aibelena temenen benschibaji lendong lir...ta metetdi.

1Timoti-5:23. Ne tepok atema aser ne tashidak asoshi joko tzü tesa mejemi yi terara amshiang. Tenyar Paul-i Tsüngrem lar Timoti temang nung tepok tashidak mekokmin tilaka keta aliba aji kanga junga meteta liasü. Timoti temang nung iba timtem keta aliba jagi aiben sayutsüngia jajaba mapang nung, timtem tetsükdaktsü ajuruba Paul-i meteta liasü. Anungji Paul-i Timoti dangi iba shiti züludang, pa tepok tashidak atema kanga aria bilema, pa temang anema/junga alitsü asoshi tzü tesa mejemi yi tera-ra mozü atema jemang ta zülusem sudi...ta angateter. Ashiko, iba yi ya tanü asen putu nung amshiba teraratsü aser temeseptsü aketba yi ya masü, saka par putu nung bulua amshiba tsükmenatsü aser sungjanglijang tzü agi yangluba koba nung teraratsü mozü aser temeseptsü maket, iba yi-ji mozü atema tera-ra jemang ta ashiba sudi...ta angateter. Tanü Khristan tajung karibo laishiba nung yi terarabo jemang ta zülua lir, anungji yi ajembaji kecha temenen masü-a ta...Pei ajunglen asaa angateter aser bangbettsü ama salep-saria jembir. Tsüngrem o agi salep-saria asaya-menu masütsüla, kechiyong iba nungji lendong lir ta metetdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilema ken-o ama tazünger angateta agitsü mepishir

Anüolen linüktem nung Khristanpur anema inyakbajenti lir

Tsüklai/February 06, 2024 (Agencies): Family Research Council indang Center for Religious Liberty ajanga ashiba agi, January 2020 aser December 2023 tsüingta anüolen linüktem nung Khristanpur anema mapa tamajung inyakba 168 liasü. Center for Religious Liberty yagi linük 16 nungi osang bendena liasü.

Tamangertem anema inyakba nungya yimjak nung sayutsüingiba aser sarasademba atema apuba aser sechi achiba, Laishiba nung ajemdaker tamangba yimsü tsütsü jembiba atema temerenshi agütsüba, COVID-19 tenokdangba sülen manidakba yong pastor tem merenshiba, koba secular tem dang nungi tesashiba merenshi, ta "Free to Believe? The Intensifying Intolerance Toward Christians in the West" nungja agütsür aliba study nung ashi.

Khristanpur anema sorkari temelaba agütsür merenshiba ya United States nung 58, Canada nung 36, United Kingdom nung 43 aser Greece nung trok liasü. Iba ama tatalokba ya France, Switzerland, Spain, Luxembourg, Norway, Sweden, Finland, Latvia, Germany, Malta, Australia aser New Zealand nunga liasü.

FRC tir aser taoba mapang U.S. Commission on International Religious Freedom nung mendenpuba inyaksang Tony Perkins-ia anüolen linüktem nung Khristanpur anema mapa tamajung inyakba khuret lemsatep.

School nung kaketshirtem gender atema mangmangba aser 'opposite sex' akumtsü jangraba tesayurtemi miimshidaksütsü aser tiazü jembitsü asoshi district indang policy nung aliba anema California nung tesayur Jessica Tapia-i ola adokba mechi February 2023 nung mapa nungi anentsü.

Australia nung Pastor Martin Beckett-i social media livestream ka nung COVID-19 lockdown tenokdangba nung aibelena kiyimba sentong ka agi ta nangzükba mechi police temi August 2021 nung bushisüingdanga liasü.

Canada nung Pastor Derek Reimer ya LGBT sentong nungi meters 200 pilar alitsü totuyuba agütsüba sülen pai manidakba yong March 2023 nung apu.

Public library nung drag queen temi otsü ashiba anema Reimer-i longkak aitba mechi

pa anaben pua liasü. Pai nüburttem meinprongba, tashi mangaba aser dangar merenshiba nung aija senchi achi mesüra tepuokdak ita trok tashi ayutsü obendang agüja liasü.

Iba report nungya linük 16 nung Khristanpur anema tamangba yimsü temeden anema atalokba 168 liasü.

Iba report zülur aser FRC indang Center for Religious Liberty nung director Arielle Del Turco-ia Western democracy nung tamangba yimsü samar ta ashi. 2020 sülen COVID-19 dak sendakba tatalokbatem ajema kumaka tamangba yimsü mechi Khristanpur anema mapa tamajung inyakba tali akumer, ta Del Turco-i ashi.

Observatory on Intolerance and Discrimination Against Christians in Europe ajanga taoba mapang report ka agütsüba nunga 2022 küm Europe tesem ajungalen Khristanpur anema mapa tamajung inyakba, züka merenshiba aser tepsetba indang shia liasü.

Iba ama mapa tamajung inyakba osang temai madoker, media coverage peria mali aser timtem ajurur alitem dak kongshiba indang iba observatory yagi ngutet.

O jembiba aser tamangba

yimsü dangar den lemsatepba azüoka ozüing tasentem yangluba ajanga Khristanpur temeden nung kongshir, abortion clinics temeket nung 'buffer zones' yangluba aser ola madoki sarasademtsü memelaba dena lir.

LGBT ken o nung mapet tsürabor, pastor aser tesayur temi jembiba aitsüba mesüra tamangba yimsü mechi temang shilem memelentsü jembiba anema ozüing yanglua tamangba yimsü temeden nung kongshi.

Report nungya Ukraine nung rara ajanga tamangba yimsü temeden nung kongshiba, Orthodox Christians anema mapa tamajung inyakba aser Russian ketdangsürtemi Khristanpur anema inyaksangshiba indanga shia lir.

Report anaprong nungya sorkar, civil society aser tamangba yimsü tsütsü telok balala tsüingta tamangba yimsü temeden wazüka ayutsü asoshi tajungba nung jembishinü akatsü shia lir.

Ketdangsür nem religious literacy tajungba agütsütsü, tamangba yimsü tsütsü media representation kasa alitsü aser tamangba yimsü aser secular society tsüingta tawa adoka aliba nung apu alatsüsa inyaksü atema Khristanpur ajungshitsü shia lir.

ANOGO ABEN TSÜNGREM DEN

Nüktzü yima sarasademba

Yisui Pa shi anogo nung, Pa tasü nungi shibai kümzüktsü akok Pa dang kanga ayimtenba aser nüktzü agi sarasadema mepishir külen, Pai kanga akhüm tsübuba asoshi Pai mepishiba angashi. Ibri 5:7

Yisu taküm asenok nem sarasadem taküm yimya agütsür. Tsüngremi asenok par chir mesüka küm daksütsü bushir (Kol. 1:27-28). Asenoki Khristai inyakba ama inyakdi süra, asenok sarasademji Pai sarasademba ama asütsüla. Khristan aikati Yisui Tebu dang mepishiba ama mepishitsü memelunger. Yisui kanga ayimtena aser nüktzü agi sarasadem. Pai kanga akhüm tsübua sarasadem nung Pai mepishiba Tebui angashi.

Süra kechiba Tebui Pai mepishiba magizük? Ibai Yisu taküm nung temenen aliba agi masü mesüra Tebui pei chir memeimba agia masü. Tebui par chir masadantet temeim agi meima liaka Techiri mepishiba nung masü ta ashir kechiaser Pai pei chir mekümzüktsü. Pa asüba ajanga alimaji kümzüktsü Pai mulungba liasü. Yamaji Kibubai tetibo na aser ner kibong mekümzüktsü. Na aser ner kibong timatamba ajanga meketa alir kümzüktsübaji kotaker Tebui mulungba asütsü akok.

Nai mepishiba magizükbaji nai agizüktsü mulunga lir asü? Nai nüktzü yima mepishiaka magizükkyonga, "Aji saka, kü mulung masü saka ne mulung süang" ta shitettsü asü? Tebui teti samaa aliba lima meimba nungi ne den jembir. Tsüngremi nai mepishiba kar tanga magizüki lir asü? Pa telangzüba agizükang. Ne timtem ajanga nai tashi angatsü angazüker asü? (Ibri 5:8). Nai angazüka lira Tsüngremi Techir dang inyakba ama naa taküm tzüpokdak ka akümstsü shimtsü akok.

Tamangba yimsü balala lenirtem ajuruba pelar: PM Modi



Hombarnü tamangba yimsü balala nungi lenirtemi Parliament nung Ato Kilonser Narendra Modi den ajurutepba mapang tangokba noksa ka yangi angur.

New Delhi, Tsüklai/February 06 (Agencies): Hombarnü tamangba yimsü balala nungi lenirtem den Parliament nung ajurutepba atema Ato Kilonser Narendra Modi-i pelaba lemsatepa liasü.

Taoba mapang Twitter ta ajaba X nung pai post ka lemsatepba nung, "Tanü Parliament nung tamangba yimsü balala nungi lenirtem den ajurutepba atema pelar. Asen linük terenlok asoshi parnoki o tajung ashiba atema

ni parnok dang pelar," ta ashi aser parnok ajurutepba noksa balala lemsatepa liasü.

Indian Minorities Foundation kübok tamangba yimsü balala nungi lenir 24-i parliament tasenba nung PM Modi aser Vice President Jagdeep Dhankhar ajurua liasü.

India nung tamangba yimsü balala tsüingta telungjem aliba alima nem metetdaksüner, ta parnoki shia liasü.

Iba telok nungya Sikh, Jain, Christian aser Parsi nungertem den chief Imam of All India Imam Organization, Imam Umer Ahmed Ilyasi aser Mahabodhi International Meditation Centre indang founder president Bhikkhu Sanghasena dena liasü.

Ilyasi-i Ato Kilonser Modi lenisüba tushia ashi aser linük ya ano maneni 'Vishwaguru' (alima lenir) takumer ta shia liasü.

Indian Minority Foundation

tentetsang HimSood-i ashiba agi, "Tamangba yimsü balala nungi lenirtem dener Indian Minority Organisation tanü Parliament atong. India ya ka dang ta onoki ajak dang shiner."

Parliament tasenba semdanga Ato Kilonser aser tatong tir den sensaksemba ya otsüsütsü mapang ka liasü, ta Sanghasena-i ashi.

"Linük yimchijimjung atema asenok ajak külemi inyaksüla," ta pai ashi.

AO OSHI ANGAZÜKDAK:

TANÜ ANGAZÜKTSÜBA OJANG



Shitarotu

(adv) menua kibong mekümi aliba tetsür (spinster)

* Tebur kanga ashishir tetsür shitarotu akümer.

Shitet

(v) meteta aküm, langzütet (could identify or answer)

* Ni Moaba jak yakta shitet aser pai ni asüngdangba ajak shitet.

OLONG PAITEP # 6690

Grid for crossword puzzle #6690 with numbers 1-19.

TIPIEN

- 2. Teburtemi tejak nung awaba - (8)
6. T _ _ _ em - (3)
8. Tzük ayudak - (3)
9. Nüngdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6689 TELANGZÜBA

TIPIEN :

- 1. Telok, 4. Aluru, 6. Ozüng,
8. Emk, 9. Kin, 10. Teti,
12. Süir, 13. Jen, 14. Ola,
16. Talak, 17. Mazük.

LANGTSÜNGLEN :

- 1. Tenükjang, 2. Luden,
3. Kiochtsü, 5. Lenti,
7. Tajangzük, 11. Teronem,
12. Sempa, 13. Jahaz.

NAI-A YA METETTER MA



BJP Launches Film On PM Modi's Guarantees

Bharatiya Janata Party (BJP)-i 2024 Lok Sabha election campaign tashi itdaksütsü atema February 6, 2024 nü Prime Minister Mudra Yojana (PMMY) nung ajemdaker yangluba film ka sayaogo. I ba film tenüng "Sapne Nahi Haqeeqat Bunte, Tabhi Toh Sab Modi Ko Chunte Hai" lir aser oshi 8- Tamil, Telugu, Malayalam, Kannada, Assamese, Odia, Bengali aser Hindi nung sayaogo. I ba ya film pungu nungi agiteta yangluba lir aser tesüiba kümtem sorkari policy tem sayur. BJP-i January 25, 2024 nü "Modi ko chunte hai" (asenoki Prime Minister Narendra Modi shimdi) yimyim agüja Lok Sabha Election 2024 tenzükogo.

Assam CM-i helicopter & chartered flights nung Rs 58 crore tema endok

Guwahati, February 6, 2024

(Agencies): Assam Legislative Assembly indang Budget session tanabuba anogo nung Sivasagar MLA Akhil Gogoi-i 2021 nungi 2024 tsüngda state sorkari chartered flights aser helicopters hire asüba nung sen endokba asüngdang.

"Chief Minister Himanta Biswa Sarma'er sorkari taoba küm ana ser tesadang nung helicopters aser chartered flights nung Rs 58,23,07,104 endokogo" ta Minister Ranjit Das-i Gogoi nem telangzüba agütsü.

"2021-22 tsüngda flights and chartered flights nung Rs

10,19,81,946 endok. 2022-23 tsüngda Rs 34,01,05,845 aser 2023-2024 tanü tashi Rs 14,02,19,313 endokogo" ta pai ashi.

May 10, 2021 nü Assam Chief Minister-i tayimtsü ajanga senzüba nung sen endokba Akhil Gogoi-isa asüngdang. Paisa Assam nung tanga minister temi helicopters / chartered aircraft nung sen endokba metetnüa asüngdang.

Chief Minister-i sorkari maparen atema senzüdang chartered aircraft mesüra helicopter nung sen endokba den anogo aser tesem tejangja agütsütsü. Chief Minister-i tayimtsü nung senzüba atema pa nijai sen agütsü magütsü ta

Gogoi-isa asüngdang.

Chief Minister-i pa nija aser par party election campaign maparen nung sorkari senpong nungi sen agiteta tayimtsütem amshi mamshi ta paisa asüngdang.

"CM Himanta Biswa Sarma-i state sorkari senpong nung sen crore aikati helicopters aser chartered planes tim mesüi amshio. Tanü tashi pai public sen amshia arur" ta Akhil Gogoi-isa ashi.

"Pai chartered planes aser helicopters ya tesem balala semdangdang, election nüboyimba mapa nung aser par kinungertem anir senzüdang amshi" ta paisa shisem.

Congress lennir aikati BJP nung adentsü: Pijush Hazarika

Guwahati, February 6, 2024

(Agencies): Congress lennir aika Bharatiya Janata Party (BJP) nung adentsü ta Assam cabinet minister Pijush Hazarika-isa ashi.

"Congress lenmang samaogo aser nükjidong mali senzür. Nübertem BJP den dena lir aser iba ya ngur Congress lennirtem aika BJP nung adentsü" ta Hazarika-isa ashi.

Taoba Aam Aadmi Party (AAP) lennir Kamal Medhi-i

tawa BJP nung adenba atema Hazarika-i "BJP-i tetsürtem asoshi inyakba ngua Medhi ajungemso" ta ashi.

"BJP-i Assam nung tetsürtem tashi itdaksütsü atema inyakogo aser iba ajanga Kamal Medhi ama lennirtem aika BJP nung adentsü ajungmesogo. Taruba anogotem lennir aika BJP nung adentsü" ta paisa metetdaksü.

February 4 nü Guwahati nung public rally nung nisung aika adenba ajanga nübertemi

Prime Minister Narendra Modi meimba aser akhümtsüba kuli agütsür, ta Minister Hazarika-isa ashi.

"BJP rally nung nisung aika adener aser iba ua party-i nübertem ajangzüksü atema inyakba ajanga lir. Assam nung election balala nung BJP-i takok nguyonga aruba ajanga nübertem ajungmesor. Tawa North Cachar Hills Autonomous Council (NCHAC) elections nunga BJP-i takok tulu ngutetogo" ta paisa ashi.

BJP-i 2047 tashi state aser linük yimsü asütsü: Tripura BJP president

Agartala, February 6, 2024

(Agencies): BJP-i 2047 tashi Tripura aser linük madak yimsü asütsü ta Mongulbarnü Tripura Pradesh BJP President Rajib Bhattacharya-isa ashi.

South District kübok Belonia nung sentong ka nung jembidang Bhattacharya-i osang metetdaksü. Iba sentong nung kibong 88 nungi voters 274-i CPIM toktsür BJP nung aden.

"Linük ajungalen Prime Minister Narendra Modi lenisüba kübok BJP-i nübor ajak atema mapa inyaker. Iba terenlok mapa ngua nübertemi BJP nung adentsü mulungteter kechiyong ozü party-i dang chichiba terenlok bentsür

arutsü. Asen state nung nisung aikati BJP nung adener" ta Bhattacharya-isa ashi.

"PM Modi-i Sanatan Dharma nung nübertem nem akhümtsüba sayuogo aser iba ya Ram Mandir lapokba ajanga lir. PM Modi-i kümsük tasemben atema Prime Minister inyaksü aser iba ya shingaia menokdangtetsü kechiyong nübertemi lemtetogo" ta paisa ashi.

"INDIA teloktep ya PM Modi den raratsü atema tentet saka parnok tang kong lir? Parnok samaogo kechiyong ajaklen Modi mopung lir aser PM Modi melena shinga mali" ta Tripura BJP president-isa ashi.

BJP-i Belonia assembly constituency nungi takok mengutet saka Lok Sabha menden anaprong takok ngua PM Modi tashi itdaksütsü mapang tongogo, ta Rajib Bhattacharya-isa metetdaksü.

"Double-engine sorkari terenlok indang dang jembir aser nübertem atema inyaker. 2047 tashi BJP-i dang linük aser state madak yimsü asütsü aser iba anema shingai menokdaktetsü. CPIM aser Congress teloktemi nübertem senzüka yutsü aser sensakertem sen auyazüka agiogo. Parnoki sensakertem atema terenlok mapa kecha meinyak. BJP-i dang sensakertem asoshi inyaksüogo" ta paisa ashi.



Meghalaya Chief Minister Conrad K Sangma-i State Convention Centre, Shillong nung Lower Primary (LP) School tesayur 346 nem appointment letters agütsüba sentong nung agiba noksa ka angur. Meghalaya sorkarisa taoba hopta Tura nung appointment letters 458 lema agütsüogo aser tang agi shilem tanabuba agi. Iba sentong nung Education Minister Rakkam A Sangma aden. (Shillong, February 6)

Russia aser China nati United States aitsü

New York, Tsüklai/February 6 (Agencies): United States-i tawa Iraq aser Syria nung tesem kar amakba atema Russia aser China nati US aitsüogo.

Hombarnü United Nations Security Council senden amenba mapang, Middle East nung tensa tamajungba kümdaktsüsa jenjang agiba atema linük ana yagi US aija liasü. Moscow-isa, US-i item tesemtem amaksü asoshi telemtetba agiba ya November ita agitsü aliba tir election dak sendaka lir.

Russia, shirnoki Ukraine amakba atema UNCS nung taoba küm ana tashi toktepa arudar, parnoki council senden agitsü mepeshia liasü. US-i Iraq aser Syria nung Iran den sendaka aliba teloktem amakba sülen iba senden ayongzuka liasü. Jordan nung drone amashia US indang base ka maka sepai asem tashi tepesetba sülen Iraq aser Syria nung item tesemtem maka liasü.

Moscow indang UN Ambassador Vassily Nebenzia-i ashiba agi, item tesemtem amakba ya US-i parnok tashi sayutsü atema inyakba lir. Paisa, UNSC senden nung ashiba agi, item tesemtem amakba ya election atongsü lia Tir Joe Biden indang administration noksa yanglushitsü merangba ka lir.

Item tesemtem amakba mapang civilian tem densema nisung aika süogo aser iba ajanga Washngton-i international temzü özüng hau ta maliba sayur, ta Nebenzia-i

shisem. Paisa, Iran densema Middle East nung aliba linüktem mangatetep adokdaktsütsü atema merangba atema US aija liasü.

Russia pusema Syria-ia, item tesemtem amakba ya US yimden yimsüsüba dak sendaka lir ta ashi. Envoy Koussay Aldahhak-i ashiba agi, US election atema nüboyimba sentong asoshi sabang ka ama linüktem amshiba aser collective security tamendakdak raksatsütsüsa tashiyim amshiba ya Damascus-i magizüker ta ashi.

Kasa mapang nung China-ia item tesemtem amakba ya aitsüogo. Beijing indang ambassador Zhang Jun-ia Middle East nung tensa mejungi küma aoba atema süoki ia bilemba lemsatepogo.

"US-i Middle East mesüra tesem balala nung mangatetep madokdaktsüner ta ashir, ajisüaka parnoki jembiba ama minyaker," ta pai ashi.

"US-i military dak sendakba nung jenjang balala agiba ajanga iba tesem nung mepetmesü tasen tenzükdaktsür aser tensa tamajungba kümdaktsür," ta paisa shisem.

Iran indang ambassador Saeid Iravani-i ashiba agi, US-i item tesemtem amakba ajanga international temzüng özüng nung aibelenogo aser tang Middle East nung mepetmesü adoker aliba nungi nüburtem tebilemba piladaktsütsü merangba ka lir. Pai US-i teyari agüja Israel-i Gaza amakba indang jembiba liasü. Iba rara nung Palestine nung 27,000

dak tema süogo. "Iraq aser Syria nung Iran indang tamendakdak kar amak ta ashiba ya tai aser US-i tashiyim amshiba nung meranglokdaktsütsü atema merangba lir," ta pai ashi.

"Middle East nung mepetmesü adokba teraji ajaki meteta lir aser aji ali atsüngba, tashiyim amshiba aser Israel-kin ka samatsütsü merangba ajanga lir, aser Gaza Strip aser West Bank nung tai maketba Palestine nungertem anema jenjang agiba mapang US-i Israel nem teyari agütsür," ta pai ashi.

Washington-i ashiba agi, parnoki Iraq aser Syria nung Iran indang Islamic Revolutionary Guard Corps den sendaktepa aliba tesemtem maka liasü, shirnoki mulung ajemba yimden yimsüsürtem aser iba tesem nung US anemba teloktem indang "axis of resistance" küm aika nongita arudar.

Tehran-i ashiba agi, parnoki Iraq, Syria, Lebanon ser Yemen nung sepaitem nem külemi masü saka jurila teyari agütsüogo aser Jordan nung US indang base ka amakba nung parnok shilem kecha mali.

Maneni US aser United Kingdom nati Yemen nung Iran den sendaktepa aliba Houthi telok maka arudar, shirnoki Gaza nung rara anendaktsütsü atema Temerem tziyüm nung Israel den sendaka aliba shishilemba dang amshiba rongtem aser US o UK na indang warships tem maka arudar.

Hamas pur samatsütsüji kü nükjidong lir: Netanyahu

Jerusalem, Tsüklai/February 06 (Agencies): US nung ketdangsurtemi, Hamas puri pur alirtem chiokdaktsütsü aser Gaza nung rara anena atatsü asoshi inyaktepa mapang Israel Ato Kilonser Benjamin Netanyahu-i Honibarnü ashiba agi, Hamas pur aser Israel amokmerenertem samatsübaji dang agizüktsü ashi tangabo kecha magizüktsü.

Osangbenertem den sensaksemba mapang Netanyahu-i ashiba agi, Pai Adolf Hitler indang "Mein Kampf" Arabic oshi nung züluba kaket ka sayu aser ashiba agi,

kaketji tanga Nazi aser propaganda den külemi Gaza nung nisung aliba kidang Israel nung sepaitemi nguteta liasü.

Israel-i Gaza nung kodang rara tembangdir iba sülen-ang iba amala antisemitic education tem mesayutsü.

"Onoki Hamas kiralongraterem; 'new Nazis,' mesamatsüra taoba mapang atalokba ama kodang ataloktsüar memetet," ta pai ashi.

Hamas puri pur orr alirtem chiokdaktsütsü atema sensaksemtem atema Central Intelligence Agency Director William Burns renema lir aser US aser regional

ketdangsurtemi ashiba agi, iba sensaksem mapang ita ana tashibosa cease-fire benoktsü atema sensaksemtem.

Ajisüaka, Netanyahu-i rara anena atatsüba indang kecha mejembi. Iba melen pai ashiba agi, pai ministers of defense and finance dang defense industries akangshitsü atema tasa ka asar sorkar dangi bener arutsü tetuyuba agütsüogo.

October 7 nü tenzükba rara nung Israel nung 1,200 tepset aser nisung 240 pur oa liasü. Israel-i ameyiper Gaza kanga mejungi maka arudar aser tang tashi nung nisung 26,000 dak tema tepsetogo.



Iba noksa nung Britain chuba Charles III aser chubatsür Camilla na January 29, 2024 nü central Londong nung aliba The London Clinic nung King Charles III prostate tuluba kumer aliba anepalur aodang tangokba angur. King Charles III dak cancer putet ta February 5, 2024 nü sangdongba ya Britain nung aika asoshi taoksatsü osang lir, kechiaser arishi küm 75 tain yimsüsür ya arishi tepiyong temang junga dang lia aru.

ALI TAYOKTSÜ LIR
At Aoyim Village (middle of the village) near 4th Mile, Chümoukedima @300 per sq.ft. (negotiable) No broker, any size land available.
Contact : 8974754265 / 8787392096

EMPLOYEES' STATE INSURANCE CORPORATION
REGIONAL OFFICE, N.E. REGION, GUWAHATI
BAMUNIMADAM, GUWAHATI - 781021 (ASSAM)

Contract yimya nung Part Time Medical Referee inyaktsü nübu bushir

Küm ka atema tsünglanglen agüja aliba tesemtem nung contract yimya nung Part Time Medical Referee inyaktsü asoshi agüja aliba format nung applications meshir:
1. Guwahati 2. Chandrapur 3. Amingaon 4. Bongaigaon 5. Goalpara 6. Dhubri 7. Barpeta 8. Nalbari 9. Tezpur 10. Nagaon 11. Jorhat 12. Numaligarh 13. Tinsukia 14. Dibrugarh 15. Silchar 16. DCBO Mangaldoi 17. DCBO Itanagar 18. DCBO Imphal 19. Aizawl 20. Shillong 21. Byrnihat 22. Dimapur 23. Agartala

Experience: State Govt. indang Senior Medical Officer / Senior most IMO of the Centre / Retired Medical Officer. (Retired Medical Officer ya 22.02.2024 nung arishi küm 63 dang tajemba asütsüla.

Qualification: Recognize süa aliba university nungi M.B.B.S aser MCI/State Medical Council nung register süa alir asütsüla.

* **Advertisement tejanga asoshi ESIC website:** www.esic.gov.in ? nung Recruitments mesüra ESIC website https://www.esic.gov.in/recruitments nung console number 9047/2024 amshia bushitsüla.

Regional Director (I/c)
ESIC, RO, Guwahati

CBC 23123/12/0014/2324

Taoba Thailand PM Thaksin anema ken o benok



Bangkok, Tsüklai/February 06 (Agencies): Küm ter jungnüa tejakdang Thailand indang taoba ato kilonser Thaksin Shinawatra-i chuba yimli mezüngmeshia jembiba atema police temi ken o benokogo.

Iba ken o ya Thaksin-i South Korea nung 2015 küm küm interview ka nung jembiba anema lir ta ketdangsurtemi Mongulbarnü ashi. Pa hopta ishika tsüngta parole nung chiochtsü akok ta bilema lia iba ken o ya benoker. Iba ken o ya jembitsü asü masüar mejangja, saka linük nung lese majeste laws tesashi kübok yimten yimsüsür anema benokba rongnung tepuokdak alisang billionaire Thaksin ya tasenba lir.

Iba ken o ya military government ajaka benok, shirnoki 2014 küm May ita Thaksin tenu Yingluck Shinawatra-i aniba sorkar atsüngdokba sülen Thailand nung yimsü süa arur. Thaksin yagi aiben chuba yimli sülen anidaktsü nangzuka lir.

Taoba mapang Thaksin ya linük nung maliba ajanga iba ken o kanga menur ang benok ta attorney general indang office nung odongtar Prayuth Pecharakun-i osangbener dang ashi.

Mangatetep agi sünger alisang billionaire aser anaben ato kilonser inyaker 2006 küm mitkari atsüngdoksang Thaksin ya bendang lima nung jenoka lir

taoba küm August ita meyipa shilang. Pai ochimashi mapa inyakba aser tim masüba nung tashi amshiba ken o nung aruli tepuokdak ayu.

Arishi küm 74 tain Thaksin ya idangjisa police hospital kati anir ao aser operation ana agiogo.

Police temi bushisüngdangba maparen tembangba sülen ang prosecutor temi ken o jembitsü-mejembitsü telemtetba agitsü, ta Prayuth-i ashi.

Thaksin-ibo aibelen mapa meinyak ta ashir aser attorney general dang pa timi amshitsü zülüogo, ta pai ashi.

Thailand nung chuba mezüngmeshiba ya aibelen tulu lir, kong constitution nunga chuba ya külemtsü shia lir.

Iba les majeste law ya alima nung tesashitiba özüng ka lir aser yangji aibelener tem küm 15 tashi tepuokdak ayur. Chuba anema nokdaker ajemreptsü asoshi iba özüng ya nok-nü ama amshir ta iba özüng anemer temi ashir.

Lanur temi anir democracy bhukuma yimtung nung 2020 küm longkak aita jajaba sülen iba özüng kübok ken o benokba tang tali akumer, koba dang Thailand nung "112" ta ajar. Küm ishika tsüngta iba özüng kübok nisung 260 shi nem temerenshi agütsüba lir.

Thaksin linüki meyiba shilangba anogo nung par Pheu Thai Party ya mitkar yariba party tem den tezüngzüktep kar yanglur sorkar kumteta liasü.

NOA aser SFA na asaya ajungkettsü atema longjemogo



Nagaland Chief Minister Neiphu Rio, Deputy Chief Minister Y. Patton aser Nagaland Olympic Association o Sports For All nungi ketdangsürtem NOA aser SFA na tenangzüktepa yangluba sülen tangokba noksa nung angur.

Dimapur, Tsüklai/February 6 (TYO): State nung grassroots ecosystem tashitaitba kümdaktsütsü atema Nagaland Olympic Association (NOA) aser Sports For All (SFA) na longjemba sangdongogo.

Iba osang sangdongba sentong nung Chief Minister Neiphu Rio, Deputy CM Y Patton, Advisor to CM aser Chairman IDAN Abu Metha, aser Asst Secretary General, NOA Neivikuolie Khatsu nung densema liasü.

Saisapong nung shilem agitsü ajungshitsü, sempet tajung aketertem ajungkettsü aser sabang tuluba nung asayartem parnok sempet sayatsü atema maongka agütsütsü atema iba telongjem ya kanga dang tongtibang jenjang ka agiba lir.

Nagaland ya sobaliba takar asüba ajanga ajaki jangja lir aser tawa saisapong nunga tejakdangi odor. Tawa Nagaland Olympic & Paralympic Games 2024 nung asaya 16 asayatsü sangdongba ajanga asayartem atema maongka agütsütsü asoshi state bendanga agütsür aliba

sayur. Archery, Athletics, Badminton, Basketball, Boxing, Cricket, Football amala asayatem ya state nung tongtibang asayatem lir. Taoba mapang Nagaland nungi Dr. T Ao (Indian Olympic football team mezüngbuba captain) aser Chekrovolu Swuro (Olympian archer aser Arjuna Awardee) nung amala asayartem atokogo.

Sentong CM Rio-i, Nagaland Olympic Association aser Sports For All (SFA) na longjemer grassroots jenjang nung asaya nung shilem agitsü ajungmesotsü aser temaba jenjang tongtetsü atema tejangraba jangrudaktsütsü atema nükjidong aliba lemsatapa liasü.

Kasa mapang nung Abu Metha-i, "iba telongjem ya Nagaland nung asaya ecosystem ulushitsü aser asayartem nem parnok sempet tendangtsü aser tajangshiba balala angutsü atema maongka agütsütsü asoshi onok nükjidong aliba den tapet lir. Külemi longjemer asayartem renloka aoba ajangshitsü yongya atar," ta ashi.

SFA koba India nung tech-

enabled multi-sports school competition platform tulutiba lir parnoki 2015 küm nungi linük nung grassroots sports ecosystem terenlok atema inyaka arudar.

Iba telongjem ajanga company yagi parnok indang IP - SFA Championships facilitate asütsü.

Telongjem indang jembiba mapang Sports For All (SFA) ngutetsang Rishikesh Joshi-i, "Nagaland Olympic Association den longjemba ajanga linük nung lanurtem toktepsü aser asaya balala asayadaktsütsü asoshi onok tinyaktsü aliba tali tashi taitba kümdaktsütsü. Nagaland nung sporting infrastructure aser asayartem kanga kara renloka odor aser iba association yagi state aser linük nung nung sporting ecosystem ajungkettsü atema inyaktsü. Ita asem tsüngda yimti 9 nung tajangzük ka-a inyakba sülen SFA Championships tang mezüngbuba North-East nunga asayatsü," ta ashi.

SAF puri küm pongu tsüngda India kübok yimti 50 nung Championships 150 ayongzüka asayatsü sentong lir.



Mokokchung, February/Tsüklai 06(TYO): Mokokchung nungi tanep Cricket asayartem tang aruya aliba Nagaland Olympic & Paralympic Games nung shilem agitsüpurtem Imkongmeren Sports Complex nung sarasadem mapang tajung ka agir apusoa luogo. Taküm Nagaland Olympic & Paralympic Games ya Dimapur aser Chümoukedima district ana külemi ayongzüka February 12 nungi 17 tashi akatsü asoshi ayongzüka lir. Nagaland Olympic & Paralympic Games nungya takum asaya 15 tashi alitsü aser cricket asaya nung shilem agitsü asoshi Mokokchung nungi apusoba mapang tangokba noksa nung angur.

Junior World Rankings top 10 nung India nung ches asayar 5 lir

Tsüklai/February 6, 2024 (2762) den asayatsü.

(Agencies): Puti otsü nung tang mezüngbuba junior world rankings nung India nung ches asayartem temaba jenjang densema top 10 nung jenjang pongu agir lir.

International Chess Federation (FIDE)-i sayaba rankings nung Grandmasters (GM) R. Praggnanandhaa (Elo rating 2747) temaba jenjang nung lir aser pa sülen D.Gukesh (2743) tasembuba, Nihal Sarin (2693) trokbuba, Raunak Sadhwani (2654) tenetbuba aser Leon Luke Meondonca (2631) turbuba nung lir.

Praggnanandhaa aser Gukesh na Canada nung taruba Candidates Tournament nung asayatsü. Iba asayamung nung takoker world title atema World Chess Champion Liren Ding

Tetsürtem rongnung India tsür ana top 10 nung züngoksema lir. India tsürtem rongnungi Sarayu Velpula (2444) tanabuba nung lir aser Woman GM (WGM) Divya Deshmukh (2427) tasembuba nung lir.

Women's section nung India tsürtem rongnungi tejen asaya GM Koneru Humpy-i rating point 2554 nguteta la tasembuba nung lir. Humpy-a Canada nung Women Candidates nung asayatsü renema lir.

World rankings nung top 10 nung meliaka WGM R. Vaishali-a taruba Women Candidates asayamung nung shilem agiba angutsü.

Ajisüaka Open category nung India nung asayar ka danga top 10 nung ia mali.

India aser Zimbabwe na July ita T20 5 asayatsü



ZC aser BCCI na tsüngda bilateral tesendaktep akangshitsü aser cricket board ana tali tajungba sendaktepa inyaksangshitsü atema sensak asemba sülen iba asayamung asayatsü lemtetba sangdonga liasü.

BCCI secretary Jay Shah-i, "alima ajunga nung cricket asaya ajungkettsü atema BCCI teti tejakdang sür inyaka arudar. Zimbabwe atema tang cricket asaya yanglushiba mapang ka lir ta onoki angateter aser tang Zimbabwe Cricket-i onok teyari nungdaker," ta ashi.

New Delhi, Tsüklai/February 6 (Agencies): Indian cricket board-i Mongolbarnü sangdong ka ajanga, secondary Indian team July ita 6 nü nungi tenzüka Zimbabwe den T20 asaya pongu asayatsü, ta metetdaktsüogo.

USA aser West Indies nung T20 World Cup June 29 nü tembangba sülen iba asayamung ya asayatsü renemogo. Iba asayamung nung India nung nungtugu asyartem shilem magitsü akok, koba taoba mapang Zimbabwe semdangba ama dang asütsü.

Asayatem ya Harare Sports Club nung July 6, 7, 10, 13 aser 14 nü asayatsü imlar.

"Zimbabwe Cricket (ZC) aser Board of Control for Cricket in India (BCCI) nati Mongolbarnü sangdong ka ajanga linük ana tsüngda Zimbabwe nung July ita Twenty20 International (T20I) asaya pongu asayatsü lemtetba sangdongogo. Iba asayamung ya July 6 nungi 14 tashi Harare nung asayatsü," ta ZC-i sangdong ka ajanga metetdaktsü.

"Onoki Zimbabwe Cricket yariba ajanga international jenjang nung cricket asaya ajungkettsü atema onoki nangzükter aliba sayur," ta paisa shisem

Asayamung dak sendakba nung ZC Chairman Tavengwa Mukuhlani-i, "July ita India team host süa T20 asayamung ka asayatsü asoshi onok kanga yongya atar, koba taküm atema international attraction tulutiba asütsü," ta ashi.

Indian team-i Zimbabwe semdangba ajanga küm tepeyong atema TV revenue ayimjemtsü. "India-i shilem tajung agiba ajanga cricket asaya kanga ajangzüka arudar aser Zimbabwe nung arua asayatsü atema BCCI-i telemtetba agiba atema parnok dang kanga pelar," ta Mukuhlani-i ashi.

BILEMDANGANG
"Timtem tekangshia ajanga nisung ka tashi itdaktsür."